



Isumaqtigiissut

**Sulinermik Inuussutissarsiuteqartut
Kattuffiata**

aamma

Nuup Bussii A/S-ip

akornanni

1. aprili 2020 – 31. marsi 2024

Imai

§ 1 - Isumaqtigiissummi pineqartut.....	3
§ 2 - Atorfinititsineq	3
§ 3 - Suliffiup sivisussusia.....	3
§ 4 - Akissarsiat	5
§ 5 - Atorfeqarsimanerup sivisussusia / pikkorissutsimut tapisiat.....	6
§ 6 - Qaangiuttoorneq.....	7
§ 7 - Sapaatini nalliuuttunilu tapisiat aamma nalliuuttuni ulluinnartigoortuni akissarsiat.....	7
§ 8 – Pigaartuunermut tapi.	8
§ 9 - Persaqusersorneqarnermut akiliutit.....	8
§ 10 - Soraarnerussutisiaqalernissamut akiliutit taakkualu akilerneqartarerat.....	8
§ 11 – Atisat Uniformit.	9
§ 12 - Assuarliuteqarsinnaatitaaneq.	9
§ 13 - Suliamik unitsitsigallarneq.	9
§ 14 - Sulinngiffeqarneq aamma sulinngiffeqarnersiutit.....	9
§ 15 - Napparsimaneq.	10
§ 16 - Naartuneq, ernineq qitornavissiartaarnerlu.	10
§ 17 - Meeqqap napparsimanerani ullormi siullermi sulinngikkallarneq.	10
§ 18 - Sulinngikkallarnerit immikkut ittut allat.....	11
§ 19 - Qinikkatut pisortanillu toqqakkatut suliassaqartitaaneq.....	12
§ 20 - Toqukkut qimagaanersiutit.	13
§ 21 - Aaqqiagiinngissutit.....	13
§ 22 - Isumaqtigiissitsiniartulerluni aaqqiagiinngissummik aalajangiineq.	14
§ 23 - Sulisut sinnisaat pillugit aalajangersakkat.	16
§ 24 - Soraarniuteqarnermik soraarsitsinermillu kalerriuteqarnerit.	17
§ 25 - SIK-p Qaammarsaanermut Ilanniartitaanermullu Aningaasaateqarfia.	18
§ 26 - SIK-p Isumaginninnermut Aningaasaateqarfia.	18
§ 27 - SIK-p Sulinngiffeqarluni Angalanermut Aningaasaateqarfia.....	18
§ 28 - Pooqattanik misissuineq.....	18
§ 29 - Piffissaq isumaqtigiissutip atuuffia.....	18

§ 1 - Isumaqatigiissummi pineqartut.

- Imm. 1.** Isumaqatigiissummi / aalajangersimasumik isumaqatigiissummi uani pineqarput chaufførerit, mekanikerit Nuup Bussii A/S-imi sulisorineqartut.
- Imm. 2.** Sulisoq isumaqatigiissummi pineqarnersoq nalornissutigineqarpat apeqqut tamanna illua'tungeriinnit isumaqatigiissuteqartunit aalajangiivigineqassaaq.

§ 2 - Atorfinititsineq.

- Imm. 1.** Chaufføreritut atorfinititsineqassapput inuit angisuumik ingerlatsisinnaanermut allagartallit, inuussutissarsiutigalugu inunniq angallassisinnaanermut uppernarsaasikkamik. Chaufføri atorfinititsineqassaaq piffissaq tamakkerlugu atorfekartutut imaluunniit piffissap ilaannaatigut atorfekartutut.
- Imm. 2.** Mekanikeritut atorfinititsineqassapput inuit svendebrevimik, ilinniarsimanermut uppernarsaammik imaluunniit inuussutissarsiutinik tunngaviusumik ilinniagaqarsimanermut STI-miluunniit ilinniagaqarsimanermut assingusumik uppernarsaatissaqartut, kiisalu angisuumik ingerlatsisinnaanermut allagartallit, inuussutissarsiutigalugu inunniq angallassisinnaanermut uppernarsaasikkamik.
- Imm. 3.** Kalaallit Nunaannut suliffissarsiortut killilersimaarnissaat pillugu Inatsisartut inatsisaat qaqugukkulluunniit atuuttoq illua'tungeriit sianigaat. Maannakkut atuuttoq: (*Kalaallit Nunaannut suliffissarsiortut killilersimaarnissaat pillugu Inatsisartut inatsisaat nr. 27 30. oktober 1992-imeersoq*)
- Imm. 4.** Aammattaaq Nuup Bussii A/S isumaqatigiissut manna aqqutigalugu kajumissaarerusuppoq sulisumi SIK-mut ilaasortangornissaannut.

§ 3 - Suliffiup sivisussusia.

- Imm. 1.** Piffissaq nalinginnaasumik suliffiusartussaq sapaatip-akunneranut nalunaaquttap-akunnerinik 40-nik sivisussuseqarpoq marloriarluni ulloq unnuarlu su-liningiffiusassalluni. Sapaatip-akunneranut piffissat suliffiusut sapinngisamik ullunut 5-inut agguataarneqarnissaat, allamik isumaqatigiissuteqartoqarsimanngippat, ingerlatseqatigiiffiup pisariaqartitai sulisullu kissaatigisaat sianigalugit.
- Imm. 2.** Kommunimi atuartut atuanngiffeqerneranni piffissaq nalinginnaasumik suliffiusartussaq sapaatip-akunneranut nalunaaquttap-akunnerinik 40-nik sivisussu-

seqarpoq marloriarluni ulloq unnuarlu sulinngiffiusassalluni. Piumasaqaa-taavoq sapaatip-akunneranut piffissat suliffiusut sapinngisamik ullunut 5-inut agguataarneqarnissaat, allamik isumaqatigiissuteqartoqarsimangippat, inger-latseqatigiiffiup pisariaqartitai sulisullu kissaatigisaat sianigalugit.

- Imm. 3.** Piffissap suliffiusup qaqgukkulluunniit atuuttup malinneqarnissaai innersus-sutigineqarpoq – tassa maannakkut sapaatip-akunneranut nalunaaquttap-akunneri 40-t. Chaufførinut piffissaq tamakkerlugu atorfeqartunut tunngatillugu sapaatip-akunneranut suliffik nikerarsinnaavoq nalunaaquttap-akunnerinik +/- 2,5-inik. Imaappoq sapaatip-akunnerani aalajangersimasumi nal. ak. 37,5-ini sulisoqarsinnaavoq, tullianili nal. ak. 42,5-ini sulisoqarluni – taamaalillunilu ag-guaqatigiissillugu sapaatip-akunneranut nal. ak. 40-ni sulisoqarluni. Soorunami sapaatip-akunnera nal. ak. 42,5-ini suliffiusoq nal. ak. 2,5-inut qaangiuttoorner-siaqarfussaaq.
- Imm. 4.** Nuup Bussii A/S- sulisut sinnisaat suleqatingalugu piffissanik suliffisanik tamanik pilersaarusiortarnermini anguniartassavaa ataasinngornermit tallimangornermut ullormut piffissat suliffiit katillutik nal. ak. 10-nit ikinnerusarnissaat. Aqutsisuusut sulisullu anguniassavaat chaufførerit piffissaq tamakkerlugu atorfeqartut piffissani pilerinartuni sulisinneqartarnissaat tamatumuunalu sapinngisamik isumagilluarneqarnissaat. Piffissap ilaani paarlattaasartut atorneqartussaapput chaufførerit piffissaq tamakkerlugu atorfeqartut piffissani sapinngisamik pitsaanerpaani sulisinnaaqqullugit.
- Imm. 5.** Sulinerup naaneranit sulinerup tulliup aallartinneranut sivikinnerpaamik nal. ak. 11-t freerfiussapput. Piffissaq suliffiusoq aaqqissuunneqassaaq sulisut nal. ak. 24-t ingerlaneranni sivikinnerpaamik nal. ak. 11-ni ataannartumik qasuersaar-sinnaanngorlugit.
- Imm. 5.1** Napparsimasoqartilluguli assingusunilluunniit immikkut ittunik pisoqartillugu nal. ak. 24-t ingerlaneranni sivikinnerpaamik nal. ak. 9-ni ataannartumik freer-toqarsinnaasariaqarpoq, ingerlatseqatigiiffiup pisariaqartitai sulisullu kissaatigisaat sianigalugit.
- Imm. 6.** Piffissamut suliffissamut tunngavissamik aamma piffissat ingerlaarfiiit pilersaaruseqartassapput sulisut sinnisaat suleqatigalugu, uparuaasinnaanermut periarfissaqartinneqassalluni. Allannguisoqassappallu, sulisut sinnisaat akuersissuteqaqqassaqqassa. Pilersaarisiaq ima siusitsigisukkut saqqummiunneqassaaq ingerlatsivik allanngortitsisinnaanissaminut periarfissaqaqqqullugu. Allannguutaasinnaasut chaufførinit kalerriutigineqassapput kingusinnerpaamik suliffissap aallartinnissaa ullunik 3-nik sioqqullugu, taamaal-

laallu akuerineqarsinnaallutik sulinerup aaqqissuussaaneranut naapertuuppa-ta.

- Imm. 7.** Chaufføri piffissaq tamakkerlugu atorfeqartoq piffissanik aalajangersimasunik suliffeqarpat sulisitsisullu kissaatigippagu piffissamut allamut nikissasoq, tamanna minnerpaamik ullunik 7-nik sioqqullugu kalterriutigineqassaaq, chaufførilu piffissamut suliffissamut allamut nikinnissaq pillugu isumasioqatigineqas-saaq.
- Imm. 8.** Bussimik ingerlatsinermi nal. ak. 3-t minut sillu 45-t qaangerneqarpata akissarsiaqluni unillatsiartoqarsinnaavoq nalunaaquttap-akunnerata affaani.
- Imm. 9.** Bussimik ingerlatsinerup nalaani nalunaaquttap-akunnerata affaa inorlugu unin-nganeq piffissatut suliffiusutut naatsorsuunneqassaaq.
- Imm. 10.** Piffissamut suliffissamut pilersaarutip avataatigut bussimik ingerlatsisoqarpat ullormut sulinerup sivitsuutigisaanik, tamanna akilerneqassaaq § 6 imm. 1 naa-pertorlugu.
- Imm. 11.** Piffissaq suliffiusoq aaqqissuunneqassaaq sullivinni avatangiisit pilligit inat-simmut qaqugukkulluunniit atuuttumut naapertuuttumik. Tamanna saneqqun-neqarsinnaavoq Nuup Bussii A/S-p siunertaani allassimasut aalajangiusima-nissaannut tamanna pisariaqalissagaluarpat. Saneqqutsineq pissaaq sulisut sinniisaata isumasioqatigineratigut.

§ 4 - Akissarsiat.

- Imm. 1.** Buschaufførit aamma mekanikerit akissarsiaqartinneqassapput akissarsiat tun-ningavii uku naapertorlugin: Akissarsiassat naatsorsorneqalissapput nalunaaqut-tap-akunnerata kuartiata aallartinneranit, kisitsinerliornermut tapit ilanngullugit.

	1.apriili 2020	1.apriili 2021	1.apriili 2022	1.apriili 2023
Chafførit	177,00 kr.	179,25 kr.	181,50 kr.	183,75 kr.
Mekanikerit	209,00 kr.	211,25 kr.	213,50 kr.	215,75 kr.

§ 5 - Atorfeqarsimanerup sivisussusia / pikkorissutsimut tapisiat.

Atorfeqarsimanerup sivisussusia / pikkorissutsimut tapisiat naatsorsorneqas-sapput akunnerup kuartiata aallartinneranit.

- Imm. 1.** Atorfeqarsimanerup sivisussusia naatsorsorneqalissaq ingerlatsivimmi atorf-nitsinneqarneq aallartiffagalugu. Ingerlatsiviup atorfnerlaat siornatigut suliffe-qarfimmi allami inuussutissarsiornikkut naleqquttumik misilittagaqarneri tunngav-egalugit atorfeqarsimanikkut sivisussusiliiffigisinnavaai ataasiakkaarlugit isumaqatiginiareernerisigut.
- Imm. 2.** Buschaufføritut atorfinititsinermi atorfeqarsimanerup sivisussusia tunngaviga-lugu tapeqartitsisoqassaaq buschaufføritut pilersaarutit malillugit angallassilluni siornatigut sulisimaneq uppernarsaatissaqartinnejqarpat.
- Imm. 3.** Mekanikeritut ilinniarsimasutut atorfinititsinermi atorfeqarsimanerup sivisussusia tunngavigalugu akissaasersorneqarneq siusinnerpaamik ilinniarnerup naamassineranit naatsorsorneqalissaq.
- Imm. 4.** Sulisoq soraarsinneqarpat qaammatilli 6-it qaangiutsinnagit atorfinitseqqin-neqarluni sulisup sulinermi unitsinneqarnerata tungaanut atorfeqarsimanermi si-visussusianik / pikkorissutsimut tapisiassanik katersareriikkani atatiinnassavai.
- Imm. 5.** Napparsimanerit nalaanni sulinermilu ajoquserneq pissutigalugu sulisinnaajun-naaqjanermi, erninermut qitornavissiartaarnermullu atatillugu sulinnginnermi kiisalu qinikkatut sulinngiffeqarnermi atorfeqarsimanerup sivisussusianik / pikkorissutsimut tapisiassanik katersisoqassaaq.
- Imm. 6.** Chaufførit aamma chaufførinut paarlattaasut atorfeqarsimanerup sivisussusia / pikkorissutsimut tapisiassat tunngavigalugit nalunaaquittap-akunneranut akis-sarsiaat ilaneqartassapput ima aningaasartalerlugit:

Atorfeqarsimanerup sivisussusia	1. aprili 2017
Ukioq 1 atorfeqareernermeri	3,00
Ukiut 2 atorfeqareernermeri	4,50
Ukiut 3 atorfeqareernermeri	6,00
Ukiut 4 atorfeqareernermeri	7,25
Ukiut 5 atorfeqareernermeri	8,75
Ukiut 6 atorfeqareernermeri	11,25
Ukiut 9 atorfeqareernermeri	13,75

§ 6 - Qaangiuttoorneq.

- Imm. 1.** Ullut 7-it ingerlaneranni nalunaaquttap-akunneri 40-t sinnerlugit suligaanni § 3 imm. 1 naapertorlugu nalunaaquttap-akunneranut akissarsiat ima taperneqasapput:

Akiliutigineqassapput nalunaaquttap-akunneranut akissarsiat 50 procentii. Qaangiuttoornersiassanik katersisoqassaaq nalunaaquttap-akunnerata kuartiata aallartinneranit.

- Imm. 2.** Aaliangersimasumik atorfekartunut, qaangiuttoornissaq ullumi pineqartumi suliffissap nalinginnaasup naanissaa nal. akunnerinik 5-inik sioqqullugu ilimasaarutigineqareersimassaaq. Ilisimatitsineqanngippat nal. akunnerisa qaangiuttoorfiit saniatigut qaangiuttoornersiffissat nal. akunneranik 1- imik ilaneqassapput tapit ilanngullugit.

§ 7 - Sapaatini nalliuttunilu tapisiat aamma nalliuttuni ulluinnartigoortuni akissarsiat

- Imm. 1.** Sapaatini nalliuttunilu sulinermi nal. akunnermusiaq tapeqartinneqassaaq. Tapisiaq nal. akunneranut akissarsiap 50%-erissavaa katarsorneqassallunilu akunnerup kuartiata aallartinneranit. Qaangiuttoorneruppat § 6 naapertorlugu tapisisitsisoqassaaq.

- Imm. 2.** Nalliuttuni ulluinnartigoortuni ullormut ilivitsumut 300,00 kr. aamma ullormut affarmut 160,00 kr. akissarsiaritinneqassapput piumasat matuma ataaniittut naammassineqarpata:

Sulisoq nalliuttup ulluinnartigoortup siuninnguatigut kingornatigullu ullormi sulifiusumi tamakkiisumik sulissaaq, napparsimalluni allamilluunniit pissuteqvilluni sulinngitsuunngikkuni, imaluunniit sila pissutigalugu sulineq unitsinneqanngippat allamilluunniit immikkut ittumik pissuteqartumik sulifik matuneqanngippat.

- Imm. 3.** Ullut nalliuttutut naatsorsuutigineqartut tassaapput:

- | | |
|--|--|
| a) Ilagiit pisortatigoortut
nalliuttui, | d) Kunngit Pingasut Uluuat (nal. 12.00-ip
kingornatigut), |
| b) Juulliaraq, | e) 1. maaji (nal. 12.00-ip kingornatigut), |
| c) Ukiutoqaq, | f) Kalaallit Inuiattut Ullorsiorfiat (21. juuni). |

§ 8 – Pigaartuunermut tapi.

- Imm. 1.** Sulisut piffissap suliffiusup nalinginnaasup avataatigut radioqartinneqartut / mobileqartinneqartut pigaartuunermut immikkut ittumik tapisiaqartinneqassapput. Pigaartuunermut tapisiaq ulluinnarni sillimanermut ataatsimut 300,00 kr.-iussaaq sapaatinilu 500,00 kr.-iussalluni. Nukinginnartumik qaangiuttoortari-aqalernermi § 6 atuutissaaq.
- Imm. 2.** Sulisoq nalinginnaasumik piffissap suliffiusup avataatigut suliartoqquneqarpat minnerpaamik nal. ak. 4-nut akilerneqassaaq tapisiaasinnaasut ilanngullugit. Akunnerit 4 qaangeraanni aaliangersimasumik tapisiaqartitsoqassaaq kr. 300 – ninik.

§ 9 - Persaqusersorneqarnermut akiliutit.

- Imm. 1.** Unnuakkut sulinermut akiliutitut persaqusersorneqarnermut tapisiaqartitsiso-qassaaq imaattumik:
Nalunaaquttap-akunneranut 40,00 kr. Persaqusersorneqarnermut tapisiaq akunnerup kuartiata aallartinneranit katarsorneqartassaaq.
- 1) Ulluinnarni nal. 18.00-ip aamma 06.00-ip akornanni
2) Arfininngornerni nal. 14.00-ip aamma 24.00-ip akornanni

§ 10 - Soraarnerussutisiaqalernissamut akiliutit taakkalu akilerneqartarnerat.

- Imm. 1.** Sulisunut 18-t sinnerlugit ukiulinnut sulisitsisoq soraarnerussutisiassanik akili-sassaaq Soraarnerussutisiaqalernissamut Aningasaateqarfimmuit SISA-mut akissarsianit § 4-mi taaneqartunit isumaqtigiissutit tunngavigalugit atorfinitsin-neqarsimasup soraarnerussutisiassanut akileeqataassutitut. Sulisup akileeqataassutissaa 1/3-uvoq sulisitsisullu akileeqataassutissaa 2/3-ulluni.
Soraarnerussutisiaqartitsisoqartassaaq soraarnerussutisiaqalernissamut aaq-qissuussinermi malittarisassani aalajangersakkat naapertorlugit.
- Soraarnerussutisiassat agguataarnerat:

Sulisitsitup akileeqataassutissai:	Sulisup akileeqataassutissai:
1.apriili 2020-mit	8,53%
	4,22%

§ 11 – Atisat Uniformit.

- Imm. 1.** Nuup Bussii A/S pisussaavoq sulisut (chaufførit aamma mekanikerit) uniformeqartissallugit uniformeqarnermut malittarisassat naapertorlugit. Uniformeqarnermut malittarisassat suliarineqassapput sulisut sinnisaat qaqgukkul- luunniit atuuttoq suleqatigalugu.

§ 12 - Assuarliuteqarsinnaatitaaneq.

- Imm. 1.** SIK isumaqatigiissutigineqarsimasoq naapertorlugu assuarliuteqarsinnaatitaav- voq ulluinnarni piffissap suliffiusartup inisisimanera aammalu arfininngornikkut sulisannginnerit sulisut kissaataannut naapertuuttumik naatsorsuutigineqan- ngissorigunigit, aammalu tamanna suliffimmut pitsaanerusussaq eqqarsaa- tigalugu naammattumik tunngavissaqarsorinngikkuniuk.

§ 13 - Suliamik unitsitsigallarneq.

- Imm. 1.** Sulisoq sulinermi nalaani sila pissutigalugu unitsinneqartoq, allamillu suliassis- neqarsinnaanngitsoq, minnerpaamik ullormut nalinginnaasumik sulinermut akissarsiaqartinneqassaaq §§ 4 – 9 naapertorlugit, angerlartitaanera piffissap suliffiusup pisarnertut aallartinnerani pigaluarpalluunniit.

§ 14 - Sulinngiffeqarneq aamma sulinngiffeqarnersiutit.

- Imm.1.** Sulisut feierneq pillugu Inatsisartut inatsisaanni nr. 10, 12. novembari 2001-imeersumi malittarisassat tunngavigalugit ukiumoortumik feeriarnissaminut pisinnaatitaaffeqarput. Inatsisartut inatsisaanni kapitali 1, § 2 naapertorlugu malittarisassat immikkut ittut matuma ataaniittut isumaqatigiissutaapput.
- Imm. 2.** Sulisoq akissarsiarisimasami 12,5 procentiinik sulinngiffeqarnersiutissaminik katersissaaq, kisianni uku katersqaataassanatik: § 15 naapertorlugu nappar- simanersiutit kiisalu § 10 naapertorlugu soraarnerussutisiassanut sulisitsisup akiliutai.
- Imm. 3.** Sulinngiffeqarnersiutinik pisassanik piumasaqarneq sulisitsisumut saqqummi- unneqassaaq kingusinnerpaamik ukiup sulinngiffeqarfiup naaneraniit qaam- matit pingasut qaangiutsinnagit. Taamaattoqarsimannngippat aningaasat SIK-p Sulinngiffeqarluni Angalanermut Aningaasaateqarfiata pissavai, Sulinngiffeqar-

Iuni Angalanermut Aningasaateqarfik pillugu isumaqtigiisummut tapiliussaq naapertorlugu.

§ 15 - Napparsimaneq.

- Imm. 1.** Sulisinnaajunnaarnermik kinguneqartumik napparsimagaanni napparsimaner- siuteqartitsisoqassaaq, napparsimalerneq sulisup nammineq piaarineratigut mianersuaalliorujussuarsimanceratigulluunniit pisimanngippat, tamannaluunniit ingerlatsivimmut nipangiussimanngippagu.
- Imm. 2.** Napparsimanermi ullormusiat ullormut napparsimaffiusumut 150,00 kr.-iupput ingerlatsivimmit akilerneqartussat.
- Imm. 3.** Ullormusiaqartitsineq unissaaq ullormi sulisup sulisinnaaleqqiffiani, sulisoq ingerlaannaq sulilinngikkaluarpalluunniit, aammal u s ulisoq peqqissinerminik nalunaaruteqanngitsooraluarpalluunniit. Ullormusiaqartitsinerli nangissaq sulisup sulisinnaaleqqikkaluarluni suliffimmi najugaqarfia qimallugu napparsimanermini katsorsartereerluni aqqutissaq pilertornerpaaq toqqaannartorlu atorlu- gu suliffiminut uternissaata tungaanut.
- Imm. 4.** Ullormusiaqartitsisoqarsinnaavoq sivisunerpaamik sapaatip-akunnerini 26-ni qaammatit tulleriiginnaat 12-it iluanni. Sulisinnaannginnerli sulinerup nalaani ajutoornermik pissuteqarpat ullormusiaqartitseqqittoqarsinnaavoq suli sapaatip-akunnerini 13-ini.

§ 16 - Naartuneq, ernineq qitornavissiartaarnerlu.

- Imm. 1.** Sulisut akissarsiaqaratik sulinngissinnaatitaapput naartuneq, ernineq qitorna- vissiartaarnerlu pissutigalugit peqanngittariaqarnerminni. Tamatumani inner- suussutigineqaannassapput pisinnaatitaaffiit Inatsisartut inatsisaanni qaquguk- klluunniit atuuttumi atortinneqartut.

§ 17 - Meeqqap napparsimancerani ullormi siullermi sulinngikkallarneq.

- Imm. 1.** Sulisoq piffissaq tamakkerlugu imaluunniit piffissap ilaannaani akissarsiaminik annaasaqarnani sulinngikkallarsinnaatitaavoq qitornap 16-it inorlugit ukiullip angajoqqaaminiittup napparsimancerani ullormi siullermi. Akissarsiaqarluni su- linngikkallartitaasoqassaaq qitornap pisariaqartumik paarineqarnissaa qulak- keerniarlugu.

Ulloq meeqqap napparsimaffia siulleq ima paasineqassaaq ulloq suliffiusoq ilivitsoq siulleq meeqqap napparsimanera pillugu sulinngitsoorfiusariaqartoq. Meeqqap ukiukitsup napparsimalernera pillugu piffissaq suliffiusoq aallarteerersoq sulisoq aggeqquneqarpat tamanna ullortut meeqqap napparsimaffiatut siullertut naatsorsuunneqassanngilaq, kisianni pissuteqarluni sulinnginertut akissarsianik annaasaqaataasussaanngitsutut.

- Imm. 2.** Meeqqap 14-it inorlugit ukiullip napparsimmavimmut unitsinneqarnerani angajoqqaat najuuffigisariaqagaanni ulla 12-it tikillugit akissarsianik annaasaqarani sulinngikkallarsinnaatitaasoqassaaq. Tamanna aamma atuutissaaq meeqqap napparsimmavimmut unitsitaanerani peqqinnissaqarfiup akiligaanik angalanermi siumut utimullu angajoqqaat meeqqamut ingiallortaappata.
- Imm. 3.** Meeqqap napparsimavimmut unitsitaaneranut tamatumunngalu atatillugu angajoqqaat ingiallortitut angalaqataanerannut atatillugu sulinngikkallarneq sulisitsisumut upernarsarneqarsinnaassaaq.
- Imm. 4.** Immikkut illuinnartumik pissutissaqartillugu nakorsamillu upernarsarneqarpat sulinngikkallarneq sivitsorneqarsinnaavvoq ulla tallimat tikillugit.
- Imm. 5.** Atornerluinermi aaqqissuussineq sulisunut ataasiakkaanut atortussajunnaarsinnejarsinnaavvoq.
- Imm. 6.** Akissarsisitsisoqassaaq sulisup nalunaaquttap-akunnermusiaanik nalinginnaasumik, taanna piffissamut suliffissamut pilersaarusiaq malillugu nalunaaquttap-akunnerinik suliffiusussaatinnejartunik gangerlugu.

§ 18 - Sulinngikkallarnerit immikkut ittut allat.

- Imm. 1.** Sulisut ilaqtutamik qanigisamik perulullutik napparsimaneranni, toquneranni imaluunniit ilisaanerani akissarsiatic pigiinnarlugit sulinngikkallarsinnaatitaapput ulla tallimat tikillugit.
- Imm. 2.** Ilaqtut qanigisat tassaapput: angajoqqaat, aapparisaq taamatulluunniit naatsorsuussat, qitornat qatangutillu, kisianni aapparisap taamatulluunniit naatsorsuussap ilaqtutai pinnagit.
- Imm. 3.** Sulisut ilaqtutamik qanigisamik perulullutik napparsimaneranni imaluunniit toquneranni, imm. 2 naapertorlugu, nakorsap allagarsiussaanik imaluunniit toqusup allagartaanik il.il. upernarsaasikkamik qinnuteqarnermikkut akiliunneqarlutik angalasinnaatitaapput suliffigisamit napparsimaruluttup uninngavigisaanut

imaluunniit toqusup najugaanut Kalaallit Nunaanni Danmarkimiluunniit.

- Imm. 4.** Imm. 1 naapertorlugu sulinngikkallarnissamik kissaatigisaq allaganngorlugu uppernarsaatitalerlugulu sulisitsisumut tunniunneqassaaq.
- Imm. 5.** Taamatut sulinnginnerup nalaani imm. 1 naapertorlugu akissarsiassat naatsorsorneqassapput piffissamut suliffissamut pilersaarummi sulisup piffissaq suliffigisartagaa nalunaaquttap-akunnermusiaalu nalinginnaasoq tunngavigalugit.
- Imm. 6.** SIK-p siulersuisuunerinut ilaasortat siulersuisuunerit ataatsimiinnerinut peqataanerminnut atatillugu akissarsiaqarlutik sulinngissinnaatitaapput amerlanerpaamik ukiumut sisamariarlutik.
- Imm. 7.** Sulisut uku akissarsiaqarlutik sulinngissinnaatitaapput:
- SIK-p siulersuisuunerinut aamma SIK-p Inuusuttaasa siulersuisuinut ilaa sortaasut,
 - SIK-p Ataatsimeersuarneranut aamma Nakkutilliisoqarfiata ataatsimiinne ranut peqataasussat, aamma
 - SISA-p siulersuisusa ataatsimiinnerannut peqataasussat amerlanerpaamik ukiumut sisamariarlutik.
- Imm. 8.** Akissarsisitsisoqassaaq taamaallaat piffissamut pineqartumut tunngatillugu suliffissamut pilersaarusiaq aamma § 4 naapertorlugin.

§ 19 - Qinikkatut pisortanillu toqqakkatut suliassaqartitaaneq.

- Imm. 1.** Isumaqtigiissut manna tunngavigalugu sulisut pisariaqarnera tunngavigalugu akissarsiaqarnatik sulinngikkallarsinnaatitaapput soorlu makkuninnga suliaqnissaq siunertaralugu:
- Inatsisartunut ilaasortaaneq,
 - kommunalbestyrelsimit ilaasortaaneq,
 - ilagiit sinnisaannut ilaasortaaneq,
 - atuarfiit siulersuisuinut ilaasortaaneq,
 - kredsdommeriuneq,
 - eqqartuusseqataasartuuneq,
 - eqqartuussivimmi illersuisuuneq,

- h) SIK-p Inuuusuttaasa siulersuisui aamma Sulinermik Inuuussutis-sarsiuteqartut Soraarnerussutisiaqalernissamut Aningaasaateqar-fiata SISA-p siulersuisui,
- i) pisortanit suliassaqartitaanerit allat pisortanit SIK-p immikkoortortaqaifiini siulersuisuni ilaasortanut imaluunniit SIK-p siulersuisuunerini ilaasortanut suliakkiutigineqartut.

§ 20 - Toqukkut qimagaanersiutit.

Imm. 1. Sulisoq suliffeqarfimmi sivikinnerpaamik ukioq ataaseq sulisooreersimasoq atorfegarnermi nalaani toquppat appaanut / inooqataanut imaluunniit qitornaan- nut 18-it inorlugit ukiulinnut qimagaasunut toqusup pilersugassarisimasaanut qimagaanersiutit § 4 naapertorlugu tunniunneqassapput:

Suliffimmi tassani sulisimagaanni:

Ukioq 1	Sap. ak. 2-ni akissarsiassat
Ukiut 2	Sap. ak. 3-ni akissarsiassat
Ukiut 5 sivisunerusumillu	Sap. ak. 4-ni akissarsiassat.

§ 21 - Aaqqiagiinngissutit.

Imm. 1. Sulisoq §§ 5 - 9-mi taaneqartunik tapisiaqassanersoq nalornissutigineqalerpat tamannalu pillugu sulisut sinnisaat aqqutigalugu saaffiginninneq naammaginar-tumik kinguneqanngippat sulisup sulisut sinnisaat aqqutigalugu tamanna SIK-p immikkoortortaqafrianut saqqummiussinnaavaa ingerlatsivimmut isuma-qatiginniniutigisassanngorlugu. Isumaqatigiittoqanngippat suliassaq matuma ataani imm. 2-mi allassimasut malillugit suliarineqassaaq.

Imm. 2. Isumaqatigiinngittoiqalerpat isumaqatigiinngissut piaarnerpaamik iluarsiniarne-qassaaq sulisup/sulisut ingerlatsiviullu isumaqatigiinniarneratigut. Isumaqati-giinniarnerup inerneran allallugu imaqarniliarineqassaaq illua'tungeriinnit atsior-neqarluni sumiiffimmilu SIK-p immikkoortortaqafrianut tunniunneqarluni.

Imm. 3. Isumaqatigiinniarneri imm. 2-mi taaneqartuni isumaqatigiissuteqartoqanngip-pat ingerlatsivik sumiiffimmilu SIK-p immikkoortortaqafria tamanna pillugu isu-maqatigiinnialissapput. Isumaqatigiinniarneq sapinngisamik piaartumik inger-lanneqassaaq, imaqarniliarlu imm. 2-mi taaneqartoq isumaqatigiinniutinut ilan-ngunneqassaaq. Ingerlatsiviup aamma SIK-p immikkoortortaqaifiata isumaqa-

tigiinniarnerisa inernerat allallugu imaqarniliarineqassaaq illua'tungeriinnit atsi-orneqartoq.

- Imm. 4.** Imm. 3-mi taaneqartuni isumaqatigiinniarnergut isumaqatigiinngissut aaqqiis-sutissarsineqanngippat tamanna Isumaqatigiissitsiniartulerluni aaqqiagiinngis-summik aalajanglisartunut, § 22 naapertorlugu, aalajangiiffigisassanngortinne-qassaaq isumaqatigiissuteqartartuni illua'tungeriit arlaata tamanna piumasarip-pagu.
- Imm. 5.** Sulisut suliaminnik unitsitsinissaminnik kalerrisaaruteqarnerata peqatigisaanik illua'tungeriit isumaqatigiinniassapput sulisut kikkut sulinermik unitsitsinermi peqataatinneqassannginnersut.

§ 22 - Isumaqatigiissitsiniartulerluni aaqqiagiinngisummik aalajangiineq.

- Imm. 1.** Isumaqatigiissitsiniartulerluni aaqqiagiinngisummik aalajangiisussat tallima-nik ilaasortaqassapput: Siulittaasoq kiisalu isumaqatigiissitsiniartartut sisa-mat. Isumaqatigiissitsiniartulerluni aaqqiagiinngisummik aalajangiiniarnermi siulittaasoq illua'tungeriinnit toqqarneqassaaq. Siulittaasumik qinersiniarnermi isumaqatigiittoqanngippat Sulisartoqarnermi Eqqartuussiviup siulittasua qinnu-igineqassaaq toqqaaqqullugu pingaartumik Sulisartoqarnermi Eqqartuussiviup eqqartuussisuisa akornannit.
- Imm. 2.** Isumaqatigiissitsiniartulerluni aaqqiagiinngisummik aalajangiisartut suliassa-miit suliassamut illuatungeriinnit toqqarneqartassapput, tassami Illua'tungeriit tamarmik isumaqatigiissitsiniaqataasartussamik ataatsimik toqqaasassamma-ta.
- Imm. 3.** Naammagittaalliuuteqartup naammagittaalliuuteqarnermini allagaqaamminut i-lanngullugit tunniutissavai isumaqatigiissitsiniartulerluni aaqqiagiinngisummik aalajangiisartussanut ilaasortaitatassatut toqqakkami aqqisa najugaasalu al-lassimaffii.
- Imm. 4.** Naammagittaalliuutigineqartup naammagittaalliornermi allagaqaatip tigunera-niit ullut 30-it qaangiutsinnagit isumaqatigiissitsiniartulerluni aaqqiagiinngis-summik aalajangiisartutut ilaasortassaattut toqqakkamik aqqisa najugaasalu allassimaffii saqqummiutissavai.
- Imm. 5.** Isumaqatigiissitsiniartulerluni aaqqiagiinngisummik aalajangiisarfimmik piler-

sitsisoqarnissaanik kissaateqarneq naammagittaalliuuteqarnermi allagaqaatitut ilusilerneqarsimannngippat naammagittaalliuut isumaqassitsiniartulerluni aaqqiagiinngisummik aalajangiisarfiup siulittaasuanut tunniunneqassaaq kingusinnerpaamik isumaqatigiissitsiniartulerluni aaqqiagiinngisummik aalajangiisarfimmik pilersitsisoqarnissaanik naammagittaalliuuteqartumut nalunaaruteqarnermiit sap. akunnerisa marluk qaangiunneranni.

- Imm. 6.** Naammagittaalliuuteqarnermi allagaqaat ilanngussartalik siulittaasumit maa-laaruteqarfigineqartumut nassiunneqassaaq, naammagittaalliuutigineqartorlu akissuteqarluni ilanngussatut saqqummiukkumasaminik ilalinnik allagaqarnis-saminut piffissarititaasumik nalunaarfigineqassaaq.
- Imm. 7.** Suliassap oqaatsitigut isumaqatigiinnutigineqarnissaa sioqqullugu siulittaa-sup aalajangiineratigut illua'tungeriit siullermeerlutik aappassaaneerlutilu im-minnut akissuteqarfiginissaminut akuerineqarnerat nalunaarutigineqartas-saaq.
- Imm. 8.** Aammattaaq Kalaallit Nunaanni eqqartuussisarnernik inatsit pillugu nalunaarummi aalajangersakkat pissutsit qanoq ittuuneri naapertorlugit qajassuarne-rusunngorlugit atuutitinneqartassapput.
- Imm. 9.** Isumaqatigiissitsiniartulerluni aaqqiagiinngisummik aalajangiisartut pilersineqarnermik kingornagut piaarnerpaamik ataatsimiittassapput. Isumaqatigiissitsiniartulerluni aaqqiagiinngisummik aalajangiisartut oqaloqatigiinneri siulittaasumit siulersorneqartussat siulittaasup peqataaffigisassavai.
- Imm. 10.** Suliassaq oqaloqatigiissutigineqareernerermigut isumaqatigiissitsiniartulerluni aaqqiagiinngisummik aalajangiisartut ilaasortaannit nalinginnaasumik amerlanerussuteqarnikkut aalajangiiffigineqartassaaq. Amerlanerussuteqartoqangippat suliassaq siulittaasumit aalajangiiffigineqassaaq. Isumaqatigiissitsiniartulerluni aaqqiagiinngisummik aalajangiisartut aalajangigaat allanngortinne-qarsinnaanngillat aammalu eqqartuussivinnut ingerlateqqinnejqarsinnaanatik.
- Imm. 11.** Isumaqatigiissitsiniartulerluni aaqqiagiinngisummik aalajangiisussat nali-lersuereernerermikkut isumaqatigiissummik unioqqtitsisimaneq pillugu akili-sussanngorttsisinjaapput.
- Imm. 12.** Isumaqatigiissitsiniartulerluni aaqqiagiinngisummik aalajangiiniarnermi oqaloqatigiissutigisat allattaavinnut allattorneqartassapput suliat ataasiakkaat naam-massineqarnerini isumaqatigiissitsiniartulerluni aaqqiagiinngisummik aalajangiiniarnermi ilaasortanit tamarmiusunit atsiorneqartussanik, taamatut-taaq siulittaasumit, taanna aalajangiisuusimappat. Isumaqatigiissitsiniartuler-

Iuni aaqqiagiinngissummik aalajangersaanerminnik illua'tungeriit tamaasa nalunaarfigissavaat.

- Imm. 13.** Aalajangiinerup inerneran nalunaarutigineqassaq ajornanngippat suliassap isumaqatigiissitsiniartulerluni aaqqiagiinngissummik aalajangiisunit tiguneqarneranit sapaatip-akunneri sisamat qaangiutsinnagit.
- Imm.14.** Isumaqatigiissitsiniartulerluni aaqqiagiinngissummik aalajangiiniarnermi ingerlatsinermik pissuteqartumik aningaasartuutaasinnaasut matussutisaannik illua'tungeriit tamarmik aningaasanik amerlaqatigiinnik Kalaallit Nuunaanni aningaaserivimmut toqqorsissapput. Aningaasat amerlassusissaat isumaqatigiissitsiniarluni eqqartuussiviup siulittaasuata aalajangissavaa.
- Imm.15.** Isumaqatigiissitsiniartulerluni aaqqiagiinngissummik aalajangiisussat aalajangissavaat suliami aningaasartuutaasut illua'tungeriit arlaata sorliup akilissanerai. Tamatuma kingorna aningaasat sinneruttut illua'tungeriinnut utertinnejassapput.

§ 23 - Sulisut sinnisaat pillugit aalajangersakkat.

- Imm. 1.** Naalakkersuisut, Finansministeriap aamma SIK-p isumaqatigiissutaat 1. agusti 1997-imeersoq atuuppoq allannguutit isumaqatigiissutip matuma pissut-sillu allat malitsigisaat ilanngullugit kiisalu atugassaritat immikkut ittut matuma ataani imm. 2-mi 3-milu taaneqartut naapertorlugit.
- Imm. 2.** Sulisut sulisullu sinnisaata ataatsimiinneranni peqataaneq taamaallaat § 4 naapertorlugu akissarsiaqaataassaaq, tassa nalunaaquttap-akunneranut akissarsiat tunngaviusut akunnerup kuartianut qaninnerpaamut akunnaallisillugit, taamaallaat piffissamut suliffissamut pilersaarut malillugu sulinerup nalaani.
- Imm. 3.** Sulisut sinnisaasa ataatsimiinnerannut SIK-p immikkoortortaqarfiata suliffe-qarfiup avataani aaqqissuussaanut peqataanermi sulisut sinnisaat § 4 malillugu akissarsiaqassaaq, tassa piffissamut suliffissamut pilersaarut malillugu sulinerup nalaani akunnerup kuartianut qaninnerpaamut akunnaallisillugit tunngaviusumik akissarsiat, annerpaamilli ullormut nalunaaquttap-akunnerinut 8-nut.

§ 24 - Soraarniuteqarnermik soraarsitsinermillu kalerriuteqarnerit.

- Imm. 1.** Sulisunut matuma ataani imm. 2-mi taaneqartup saniatigut allatut kipiffeqanngitsumik ingerlatsivimmi sulisimasunut atuupput soraarniuteqarnermi soraarsitsinermilu siumoortumik kalerriisarnissamut aalajangersakkat imm. 2-mi 3-milu taaneqartut.
- Imm. 2.** Atorfinititsitaanermi qaammatip siulliup iluani atorfefqarnerup atorunnaarsinne-qarnissaanut tungasumik sulisitsisoq sulisorluunniit siumoortumik kalerriinissaminnut pisussaatitaanngillat.
- Imm. 3.** Atorfinititsitaanermi qaammatip siulliup kingorna soraarsitsiniarnermi soraarni-arnermiluunniit siumoortumik kalerriinissat makku atuutissapput:

	Sulisitsisumit	Sulismiit
Ukioq siulleq (Kisianni qaammat 1 pinnagu)	Sap. Ak. 2	Ullut 3
Ukiut atorfefqarfiusut 2., 3., 4., aamma 5	Sap. ak. 4	Sap. ak. 2
Tamatuma kingorna	Sap. ak. 6	Sap. ak. 3

- Imm. 4.** Imm. 1-imi taaneqartutut pissusilimmik kipititsinertut naatsorsuutigineqassangillat napparsimaneq ingerlaannartumik aamma nalunaaqtap-akunneri 24-t qaangiutsinnagit ingerlatsivimmut nalunaarutigineqartoq, erninermi sulinngineq aamma maskiinamik unittoorneq, suliassaaleqineq assigisaallu pissutigalugu sulinermik kipititsineq, sulisoq neqeroorfigineqarnermigut suleqqilerpat.
- Imm. 5.** Siumoortumik kalerriisussaaneq atorunnaassaaq sulisoq sumiginnaappat imaluunniit suliffimmi suliassaarunneq maskiinanik unittoornermik pissuteqartumik tamakkiisumik ilaannakortumilluunniit naatsorsuutiginngisamik unittoornermik pissuteqartumik sulisoqarsinnaajunnaarallarsimappat.
- Imm. 6.** Sulisunik ataasiakkaanik soraarsitsinissamut pisinnaatitaanerup atorneqarnerani assigiinngitsuliortoqassanngilaq. Suliffeqarfimmi ajunngitsussaq pillugu soraarsitsisoqartassaaq, sumiiffimmi iluunniit isumaqatigiinniarnikkut isumaqatigiittooqarsinnaanngikkaangat isumaqatigiinnginnejq isumaqatigiissitsiniartulerluni aaqqiagiinngissumik aalajangiisartunut saqqummiunneqassaaq, isumaqatigiinniartarnerni illua'tungeriit arlaata tamanna piumasarippagu.
- Imm. 7.** Soraarsitsineq soraarniarnerlu tamarmik allakkatigut pisassapput.

§ 25 - SIK-p Qaammarsaanermut Ilanniartitaanermullu Aningaasaateqarfia.

SIK-p Qaammarsaanermut Ilanniartitaanermullu Aningaasaateqarfianut nalunaaquttap-akunneranut suliffigineqartumut 0,75 kr. akiliutigineqartassapput.

§ 26 - SIK-p Isumaginninnermut Aningaasaateqarfia.

Nuup Bussii A/S SIK-p Isumaginninnermut Aningaasaateqarfianut 1. aprilli 2020-imit nalunaaquttap-akunneranut suliffigineqartumut 0,35 kr.-inik akiliuteqartassaaq.

Nuup Bussii A/S-ip akiliutissai ullaat 14-ikkaarlugit kingumut akilerneqartassapput aningaaserivimmut SIK-p toqqagaanut.

§ 27 - SIK-p Sulinnngiffeqarluni Angalanermut Aningaasaateqarfia.

Nuup Bussii A/S SIK-p Sulinnngiffeqarluni Angalanermut Aningaasaateqarfianut 1. aprilli 2020-imit nalunaaquttap-akunneranut suliffigineqartumut 0,55 kr.-inik akiliuteqartassaaq.

Nuup Bussii A/S-ip akiliutissai ullaat 14-ikkaarlugit kingumut akilerneqartassapput aningaaserivimmut SIK-p toqqagaanut.

§ 28 - Pooqattanik misissuineq.

Pooqattanik misissuisoqaraangat chaufføri ingerlatsivimmilu sulisut ikinnerpaamik marluk najuuttassapput.

§ 29 - Piffissaq isumaqatigiissutip atuuffia.

- Imm. 1.** Isumaqatigiissut una 1. aprilli 2020 atuutilerpoq. Isumaqatigiissut qaammatinik pingasunik sioqqutsisumik kalerriuteqarluni 1. aprilli 2024-mut illua'tungeriinnitatorunnaarsinnejqarsinnaavoq, siusinnerpaamillu 31. marts 2024-mi.

Imm. 2. Isumaqatigiissutip atorunnaarsinneqarnerata kingorna nutaamik isumaqatigiissuteqarnissap / aalajangersimasunik isumaqatigiissuteqarnissat tungaannut 31. marsi 2024 killigalugu akissarsiat pillugit isumaqatigiissummi atuuttut ma-linneqassapput.

Nuuk, ulloq 26. juuni 2020.

Sulinermik Inuussutissarsiuteqartut
Kattuffiat

Nuup Bussii A/S

.....
Jess G. Berthelsen
Siulittaasoq

.....
Mogens Nathansen
Direktør